



宋槧太平御覽



403
38



13
403
38



太平御覽卷第二百二十八

職官部二十六

敘卿 太常卿

敘卿

韋昭辨釋名曰卿慶也言萬國皆慶賴之也
帝王世紀曰九卿者所以參三公也
白虎通曰卿章也章善明理也
韋昭辨釋名曰漢置十二卿一曰太常二曰太僕三曰太
衛尉四曰光祿五曰宗正六曰執金吾七曰大司農八曰
少府九曰大鴻臚十曰廷尉十一曰大長秋十二曰將作
大匠辨云漢正卿九一曰太常二曰光祿勳三曰衛尉四
曰太僕五曰廷尉六曰鴻臚七曰宗正八曰司農九曰少
府是為九卿



新金圖書

此係明治
八年八月
廿八日
由山田
君以贈
所購以
贈

通典曰後漢九卿而分屬三司太常光祿勳衛尉三卿並
太尉所部太僕廷尉大鴻臚三卿並司徒所部宗正大司
農少府三卿並司空所部

尚書周官曰六卿分職各帥其屬以倡九牧阜成兆民六卿

各帥其屬官大夫士治其所分之職倡道九州牧伯為政大成兆民之性命

漢官儀曰卿中秩二千石綬青地桃花三彩

又曰衣裳公侯華蟲卿大夫藻火

左傳曰齊侯使劬仲為卿辭曰羈旅之臣幸若獲宥宥及

於寬政赦其不閑於教訓而免於罪戾弛於負擔君之惠

也所獲多矣敢辱高位以速官謗請以死告以死為誓

又曰卿非君命不越境

又曰晉蒐于被盧命趙衰為卿讓於先軫杜預曰先軫晉下軍之佐原軫

周禮曰朝士掌外朝之法左九棘孤卿大夫位焉樹棘以為位者

取其赤心而外刺象赤心三刺

春秋漢合孳曰故三公象五岳九卿法河海三公在天法
三台九卿法北斗

國語曰晉悼公使張老為卿辭曰臣不如魏絳之智能治
大官其仁可以利公室若在卿位外內必平

漢官曰司馬安巧官四至九卿

謝承後漢書曰李叔諫更始曰夫三公上應台宿九卿下

括河內

梁書曰武帝天監七年以太常卿加置宗正卿以司農為

司農卿三卿是為春卿加置太府卿以少府為少府卿加

太僕卿三卿是為夏卿以衛尉衛廷尉卿將作大匠卿三

卿是為秋卿以光祿勳為光祿卿大鴻臚為鴻臚卿都水

使者為大舟卿三卿是為冬卿凡十三卿皆置丞及功曹

主簿

北齊書曰以太常光祿衛尉宗正太僕大理鴻臚司農太府是為九寺

莊子曰楚昭王迎屠羊說以執珪之位馬彪曰諸侯三卿皆執珪

說苑曰秦繆公使賈人載鹽於衛賈人買百里奚使將車

至秦繆公觀鹽見百里奚牛肥公問之對曰臣牛食之以

時使之不暴是以肥也公知其君子以為上卿

又曰九卿者不失四時通於溝渠補隄防種樹木美五穀

如是舉以為九卿之事常在於德

又曰齊桓公使管仲治國對曰賤不能臨貴桓公以為上

卿而國不治對曰貧不能使富桓公賜之齊市租一年而

國不治桓公曰何故對曰踈不能成近桓公立以為仲父

國大安孔子曰管仲之賢不得此權者亦不能使其君面

南而伯矣

太常卿

六典曰太常卿之職掌邦國禮樂郊廟社稷之事以八署

分而理焉一曰郊社二曰太廟三曰諸陵四曰太極五日

鼓吹六曰大醫七日太卜八曰虞犧摠其屬行其政令

尚書曰堯典曰伯夷汝作秩宗典朕三禮

周禮春官曰太宗伯一人掌天地神祇人鬼之禮

史記曰高祖滅秦登尊號羣臣飲爭功醉或怨妄呼拔劍

擊柱上患之於是叔孫通進說遂為綿蕪子悅切野外習之

月餘通曰可試觀上使行禮帝輦出房百官執職傳警引

諸侯王以下次奉賀莫不震恐肅敬諸侍坐殿上皆伏抑

首以尊卑起上壽觴九行謁者言罷御史執法舉不如儀

者趣輒引去竟朝置酒無敢譴諱失禮者於是高祖曰吾

今日乃知爲皇帝之貴也拜通太常賜金五百斤通因進言曰諸弟子儒生隨臣久矣與共爲儀願陛下官之高帝悉以爲郎通出皆以五百斤金賜諸生諸生曰叔孫生聖人也知當世務

漢書曰太常古官云伯夷秩宗典三禮欲令國家盛大社稷常存故稱太常

又曰奉常官掌宗廟禮儀有丞景帝六年更名太常

又曰杜業有才能選爲太常數言得失不事權貴

又曰宣帝地節四年任官爲太常坐人盜茂陵園中物免

又曰武帝元鼎四年鄼侯蕭壽成爲太常坐犧牲不如令

論

又孝武帝元朔元年孔臧爲太常坐南陵橋壞衣冠道絕免

東觀漢記曰周澤少脩高節耿介特立好學問治嚴氏春秋門徒數百人隱居山野不汲汲於時俗拜太常果敢數有直言朝廷嘉其清廉

後漢書曰栢榮拜太常榮初遭倉卒與族人栢元卿同饑厄而榮講誦不息元卿嗤榮曰但自苦氣力何時復施用乎榮笑不應及爲太常元卿歎曰我農家子豈意學之爲利乃若是哉乘輿嘗幸太常府令榮坐東南設几杖會百官驃騎將軍東平王蒼以下及榮門生數百人天子親自執業旣罷悉以太官供具賜太常家其恩禮若此

又曰栢榮及子郁皆爲太常初榮受朱普學章句減其煩辭後郁又刪之由是有栢君大小太常章句

又曰靈帝欲以羊續爲太尉時拜三公者皆輸東園禮錢千萬令中使督之名爲左騶騶騎也其所之往輒迎致禮敬

厚加贈賂續乃坐使人於單席舉緼袍以示之曰臣之所資唯斯而已左騶白之帝不悅以此故不登位而徵為太常

又曰楊賜以病罷居無何拜太常詔賜御府衣一襲衣單曰所服冠幘綬玉壺革帶金錯鈎佩金錯以金間錯其文

續後漢書曰張奐字然明拜太常卿奐有清節可否之間強禦不敢奪也該覽羣籍古今詳備

又百官志曰太常卿每祭祀先奏禮儀及行事則贊天子大射養老喪皆奏其禮儀秩比中二千石

華嶠後漢書曰劉愷為太常論議常引正大義諸儒為之語曰難經伉伉劉太常

魏書曰和洽字士陽汝南西平人轉為太常清貧守約至賣田宅以自給明帝聞之加賜穀帛

又曰常林從光祿勳為太常晉宣王以林鄉邑耆老每為之拜或謂林曰司馬公貴重君宜且止之林曰司馬公自欲敦長幼之序以為後生之法貴非吾之所畏拜非吾之所制也言者慙而蹢躅

又曰邢顒字子昂時人稱德行堂堂邢子昂文帝以為太常

晉書曰鄭默字思元遷太常山濤欲舉一親為博士見默語曰卿似尹翁歸令吾不敢復言謂其柔而能整也

又曰張華為太常以太廟屋棟折免官○臧榮緒晉書曰成熙五年詔曰華表字偉容清賢履道內貞外順歷位忠

恪言行不玷其以表為太常卿
晉起居注曰安帝三年太常臨川王寶啓府舍窄狹不足移家母鍾年高違離靡寧乞還第攝事詔聽之

晉中興書曰蔡謨字道明拜太常咸康四年臨軒門下奏非祭祀宴饗則無設樂謨奏宜有金石顯宗納焉臨軒作樂自此始也

又曰建元元年詔曰太常職典天地兼掌宗廟其爲任也可謂重矣是以古今選建未嘗不妙簡時望兼之儒雅會稽王淑履尚清虛志道無倦優游諷議朕所諮仰其以王領太常本官如故

又曰賀循字彥先元帝以賀循爲太常而散騎常侍如故循以九卿舊不如官唯拜太常而已中宗踐祚下令曰循冰清玉潔行爲俗表加以位處上卿服物蓋身而已屋裁庇風雨孤常造其廬特以爲慨然賜以六尺床席褥并錢二十萬以表至德

齊書曰張瓌以雍州刺史拜太常自謂閑職武帝曰卿輩

未富貴謂人不與既富貴復欲委去之瓌曰陛下御臣等若養馬無事就閑廐有事復牽來帝猶怒遂以爲散騎常侍

北齊書曰趙彥深五歲母傅氏謂之日家貧兒小何以能濟彥深泣而言日若天哀矜兒大當仰報傅感其意對之流涕及彥深拜太常卿還不脫朝服先入見母跪陳幼小孤露蒙訓得至於此母子相泣久之然後改服

後周書曰長孫紹遠爲太常廣召工人制樂器土木絲竹各得其宜唯黃鍾不調紹遠每以爲意嘗因退朝經韓使君佛寺前過浮圖三層之上有鳴鐸焉忽聞其音雅合宮調取而配奏方始克諧

又曰斛斯徵遷太常卿自魏孝武西遷雅樂廢缺徵博採遺逸稽諸典故創新改舊方始備焉又樂有淳音淳于者近

代絕無此器或有自蜀得之皆莫之識徵見之曰此罇于也衆弗之信徵遂徵于寶周禮注以芒筒搏之其聲極振衆乃歎服徵乃取以合樂焉

又曰建六官置太宗伯卿一人掌邦禮以佑皇帝和邦國是爲春官

唐書曰趙宗儒長慶初爲太常有師子樂備五方之色非會朝聘享不作幼君荒誕伶官縱肆中人掌教坊者移牒取之宗儒不敢違以狀白宰相宰相以宗儒懦怯不任事改太子少師

又曰崔郊拜太常卿故事太常卿初上大闕四部樂於官署觀者縱焉郊自私第去帽親導母輦公卿避之

又曰王涯拜太常文宗以樂府之音鄭衛太甚欲開古樂命王涯詢於舊工取開元時雅樂選樂童按之名曰雲韶

樂樂曲成涯與太常丞李廓少府監庾承憲押樂工獻於黎園亭帝按之於會昌殿上悅賜涯等錦綵

又曰竇誕爲太常奏用音聲博士皆爲太樂鼓吹官僚於後彈胡琵琶胡人白胡達竹伯夷積勞計考並至太官自是以聲伎入流品者蓋以百數

應劭漢官曰北海周澤爲太常恒齋其妻憐其年老瘦弱窺內問之澤大怒以爲干齋掾吏扣頭爭之不聽遂收送詔獄并自劾論者非其激發諺曰居代不諧爲太常妻一歲三百六十日三百五十九日齋一日不齋醉如泥既作事復低迷○漢官典職曰惠帝改太常爲奉常景帝復爲太常蓋周官宗伯也

漢官解詁曰太常掌社稷郊祀事重職尊故在九卿之首衛宏曰太常主導贊助祭皆平冕七旒玄上纁下華虫七

章漢陵屬三輔太常月一行漢書注顏師古曰太常者王之旌也畫日月焉王有大事則建以行禮官主奉持之故曰奉常後改曰太尊大之義也

齊職儀曰太常卿一人品第三秩中二千石銀章青綬進賢兩梁冠絳朝服佩水蒼玉王朗云西京太常行陵赤車千乘○益部耆舊傳曰趙典字仲經爲太常雖身處上卿而布被瓦器

梁陸陞爲光祿讓太常表曰昔者楚德方盛叔敖濯衣漢道克昌王陽結綬故拜命無辭受爵不讓況宗卿清重歷選所難漢晉已降莫非素範辭爵則栢郁張奮讓封則丁鴻劉愷潘^音夷之文雅純深華表之從容退嘿自此迄茲風流繼軌以臣況之曾無等級

陳沉炯爲周弘正讓太常表曰臣聞玉爲雕楹不取材於

蟠木丹朱繡黼豈襲冕於薜蘿何則適用各有其宜朝野不可一指叔孫之野外定禮倍資典實刁協之躬爲唱引豈易其儀儻九賓闕相封禪失儀責以司存云誰之咎況南史執簡轉見違才君舉必書尤難妄冒

太平御覽卷第二百二十八

太平御覽卷第二百二十九
 職官部二十七
 太常少卿
 太祝
 太廟令
 太樂令
 太醫令
 光祿令
 少卿
 太官令
 太常少卿

太平御覽卷第二百二十九

職官部二十七

太常少卿

丞

博士

太祝

協律郎

太廟令

太樂令

太醫令

廩犧令

光祿令

少卿

太官令

太常少卿

六典曰凡有事於宗廟少卿帥太祝齋郎入薦香燭整拂神幄出入神主將享則與良醞令實罇彝

後魏書曰太和十五年置少卿官太常少卿一人第三品上至二十二年降為正四品

又曰景明初班職令太常少卿第四品上第一清選明禮

兼天文陰陽者爲之

又曰元順爲太常少卿以父憂去職哭泣歐血身自負土時年二十五便有白髮免喪抽去不復更生世人以爲孝思所致

三國典略曰齊太常少卿表聿修巡省河南諸州兗州刺史邢邵與聿修故舊嘗於省中盛呼聿修爲清郎至是遣送白紬爲信聿修不受與邵書郎曰瓜田李下古人所慎多言可畏譬之防川願表此心不貽厚責邵亦忻然報書曰一日之贈率爾不思老夫忽忽意不及此敬丞來旨吾無間然弟昔爲清郎今作清卿矣

唐書曰馮定爲太常少卿文宗每聽樂鄙鄭衛聲詔奉常習開元中霓裳羽衣舞以雲韶樂和之舞曲成定摠樂工閱於庭定立於其間文宗以其端凝若植問其姓氏翰林

學士李珣對曰此馮定也文宗喜問曰豈非能爲古章句者耶乃召升階文宗自吟定送客西江詩吟罷益嘉因錫禁中瑞錦仍令大錄所著古體詩以獻

太常丞

六典曰太常丞二人從五品上秦有奉常丞漢因之秩比千石魏晉宋皆置一人

漢書曰韋弘爲太常丞職掌陵廟煩劇多過父賢勅令自免懷嫌不至去官及賢疾篤果坐廟事繫獄矣

宋百官志曰太常丞視尚書郎銅印黃綬一梁冠品第七掌舉陵廟非法

陶氏家傳曰覆之字孫宗爲太常丞凡宗廟疑義多所決定時人爲之語曰定禮決疑問陶覆之

陶氏職官要錄曰晉宋九卿丞皆進賢一梁冠介幘皂衣

銅印黃綬齊梁墨綬

太常博士

六典曰太常博士掌辨五禮之儀式本先王之法制適變隨時而損益焉凡大祭祀及有大禮則與卿導贊其儀凡王公已下擬諡皆跡其功德而爲之褒貶
通典曰博士魏官也魏文帝初置晉因之掌引道乘輿王公已下應追諡者則博士議定之
晉中興書曰博士之職端委佩玉朝之大典必於詢度當以正道克厭人望然後爲可

唐書曰王彥威太原人世儒家少孤貧苦學尤通三禮無由自達元和中遊京師求爲太常散吏部卿知其書生補爲檢討官彥威於禮閣掇拾自隋已來朝廷沿革吉凶五禮以類區分成三十卷獻之號曰元和新禮繇是知名特

授太常博士

又曰陸亘爲太常博士寺有禮生孟眞久於其事凡吉凶大儀禮官不能達率訪其眞亦賴是須姑息元和七年冊皇太子將撰儀注眞亦欲參預亘答之由是禮儀不專於胥吏

郭子曰張憑舉孝廉詣劉眞長還船須吏眞長至遣覓張孝廉船同旅愕然既同載俱詣撫軍劉前進謂撫軍曰今日爲公得一士太常博士之選既前撫軍與之言咨嗟稱善乃曰張憑勃倖爲理窟卽用爲太常博士

太祝

六典曰太祝掌出納神主于太廟之九室而奉享薦禘祫之儀

周禮曰太祝掌六祝之辭以事鬼神示祈福祥求永貞一

日順祝二日年祝三日吉祝四日化祝五日瑞祝六日筮
祝鄭司農曰順祝順農年也年祝求永貞也吉祝祈福祥
也化祝弭災兵也瑞祝逆時雨寧風旱也筮祝遠罪疾也
漢書百官表曰太常屬官有太祝令丞景帝六年更名爲
祝祀武帝太初元年更曰廟祝
東觀漢記曰陰猛好學溫良稱於儒林以郎遷爲太祝令
續漢書曰太祝令秩六百石掌祠讚祝迎送神丞主祝小
祝

協律郎

六典曰協律郎掌知六律六呂以辨四時之風氣八風五
音之節

漢書曰武帝時李延年善新聲以爲協律都尉

魏志曰武帝平荊州得杜夔知音識舊樂故以爲協律郎

太廟令

漢書百官表曰太常屬官有諸廟令長丞

續漢書曰高廟令一人六百石主守宗廟掌按世祖廟令

一人

宋書太廟令一人主守宗廟案行洒掃衆事領齋郎二十

四人

齊職儀曰周有守祧之官掌先王廟令

陵令

六典曰陵令掌先帝山陵率戶守衛之事丞爲之貳凡朔
望元正冬至寒食皆修饗於諸陵若橋陵則日獻羞焉凡
功臣密戚請陪陵葬者聽之以文武分爲左右而列若父
祖陵陪子孫從葬者亦如之

周禮曰冢人下大夫二人中士四人掌公墓之地辨其兆

域先王之葬居中以昭穆為左右

漢書曰太常屬官有諸陵令元光元年分諸陵邑屬三輔又曰司馬相如為茂陵令

續漢書曰太常職掌先帝陵每園令各一人秩六百石守

園陵按丞及校長各一人

戒賊盜齊職儀曰周有墓大夫冢人之職掌先王之墓

又曰每陵令一人品第七秩四百石銅印墨綬進賢一梁冠絳朝服

唐書官品志曰梁天監七年又詔以為陵監之名不出前詔且宗廟憲章既備典禮園寢職司理不容異諸正陵先立監者改為令於是陵置令矣

胡廣陵令箴曰昔在黃葉葬野衣薪禮非極哀不樹不封瓦棺聖周聚夏收謂壤不毀膚賄不害生是謂皇極百王

此經故厚不可皇薄不可王乃眷西顧爰矩孝文陵臣司墓敢告守人

太樂令

六典曰太樂令掌教樂人調合鍾律以供邦國之祭祀饗讌丞為之貳

漢書百官表曰太常屬官有太樂令丞

續漢書曰明帝永平十三年曹褒奏尚書璇璣鈴曰有帝漢德合作樂名天子下詔改太樂令丞以應圖讖

又曰太樂令秩六百石掌伎樂人凡國祭祀掌奏樂及大司樂掌其陳序

晉起居注曰成帝咸和中詔太樂令載綏教官伎樂勤勞賜米百石布二十疋

太醫令

六典曰太醫令掌諸醫療之法丞為之貳其屬有四曰醫師針師按摩師呪禁師皆有博士以教之考試登用如國子監之法

漢書曰百官表曰少府屬官有太醫令丞無員多至數十人

續漢書曰太醫一人秩六百石有藥丞主藥方丞

魏略曰脂習字元升除太醫令與孔融親善融被誅習獨往哭之黃初中以習有樂布之節賜拜中散大夫

應劭漢官注曰太醫周官也兩梁冠秩千石

典論曰中常侍張讓子奉為太醫令與人飲酒輒掣引衣裳發露形體亂其舄履使小大無不傾倒

崔寔太醫令箴曰動不肆勤靜不宴逸有疾歸天醫無能恤晉平好內四時是一非鬼非食惑以自失雖有秦和焉

所施術太上防疾其次萌牙腠理不蠲骨髓奈何

廩犧令

六典曰廩犧令掌薦犧牲及粢盛之事丞為之貳凡三祀之牲牢各有名數

昊天上帝以蒼地皇祇以黃神以黝五帝之牲各以方色

韋昭辨釋名曰釋云廩犧犧戲也廩養之也辨云六牲取其純毛者別養之以奉祭祀純色者少故名犧犧希也

周禮曰牧人下士掌牧六牲以供祭祀

漢書百官表曰內史屬官有廩犧令丞尉後屬司農

齊職儀曰周牧人之職也掌六牲陽祀用騶陰祀用騶取純毛者光武中興屬河南秩六百石

光祿卿

六典曰光祿卿之職掌邦國醪醴膳羞之事摠太官珍羞良醢掌醢四署之官屬修其儲備謹其出納少卿為之貳

有大祭祀則省牲饗視濯漑

漢官解詁曰士之權貴不過尚書其次諸吏諸吏光祿勳是也

應劭漢官儀曰光明也祿爵也勳功也言光祿典郎謁諸虎賁羽林學不失得賞不失勞故曰光祿勳

唐書官品志曰光祿卿位視太子中庶子掌宮殿門戶統守黃門華林園暴室等令。漢書郎中令秦官武帝太初元年更名光祿勳掌宮殿門戶秩中二千石

又曰石建為郎中令奏事下建省讀驚曰書馬者與尾而五今乃不足一獲譴死矣其謹慎如此

又曰周仁景帝時為郎中令為人陰重不洩服虔曰質重不泄人之陰謀也師古曰陰密也言為性密重不泄人言也以是得幸出入卧內於宮祕戲仁常在傍終無所言

又曰張安世字孺子為光祿勳郎有醉小便殿上主事白

行法安世曰何以知其不覆水耶郎有淫官婢婢兄自言

安世怒以奴淫汚衣冠告署撻奴其隱人過皆此類也

東觀漢記曰孫堪字子雅為光祿勳以清廉稱與周澤相

類澤字雅都京師號之為二雅

又曰劉昆字桓公為光祿勳授皇太子及諸王小侯五十

人經昆老退位以二千石祿終其身

又曰邵馴字伯春鄉里號之曰德行恂恂邵伯春章和中

為光祿勳

後漢書曰杜林字伯山扶風人也林少沉審博學多聞世

稱通儒為光祿勳內奉宿衛外揔三署郎有好學者輒見

引進朝夕滿堂

又曰馬防字公平扶風人也防貴寵最盛與九卿絕席拜

光祿卿

又曰張湛字子孝拜光祿勳光武臨朝或有惰容輒陳諫
常乘白馬上後見湛輒曰白馬生且復諫矣
又曰表彭順帝初為光祿勳行至清為吏龕袍糲食
續漢書曰荀爽字慈明為光祿勳視事三月策拜司空
謝承後漢書曰楊賜字伯獻拜為光祿勳嘉德殿前有青
赤氣詔特進遣中使問賜祥異禍福吉凶所在以賜博學
碩儒故密諮問宜極陳其意嘗上疏陳請案春秋讖天投
蜺海內亂今妾嬖閹尹共專國政之所致也
魏志曰鄭袤為光祿勳母丘儉作亂帝自征之百官祖送
時袤疾不任會上謂王肅唯不見鄭光祿為恨袤聞自輿
追上上笑曰知生必來遂與同載問以計謀帝甚重之
又曰王肅字子雍為光祿勳時有二魚長尺集武庫之屋
有司以為吉祥肅辨之曰魚生於泉而見於屋鱗介之物

失其所也邊將其殆有弃甲之變乎其後果有東關之敗
又曰表渙字曜卿為中郎令時言劉備死群臣皆賀渙以
嘗為備吏獨不賀卒官太祖為之流涕

吳志曰石偉字公操南郡人少好學修節不殆介然獨立
有不可奪之志舉茂才賢良方正皆不就孫休即位將徵
偉累遷至光祿勳及皓即位朝廷昏亂偉乃辭老耄固疾
乞身

又曰薛瑩字道言以時法政多謬舉措煩苛瑩每上便宜
陳緩刑簡役以濟□□育百姓頗或施行遷光祿勳
晉中興書曰鄭默字思元轉光祿勳寬冲博愛不以聲色
矜人雖卒徒廝養皆遇之以恩
宋書曰王惠宋國初建當置郎中令高祖難其人謂傅亮
曰今用郎中令不可令減表曜卿也既而曰吾得其人矣

乃以惠居之
孟宗別傳曰宗為光祿勳大會宗先少酒偶有強者飲一杯便吐傳詔司察宗吐麥飯察者以聞上乃歎息曰至德清純如此

光祿少卿

後魏職令日光祿少卿第四品上第二請用肅勤明敏兼職古典者

唐書曰柳亨拜光祿少卿太宗每誠之曰與卿舊親情素兼宿卿為人交遊過多今授此職宜存簡靜亨性好射獵有饗酒之名此後頗自勗勵杜絕賓客約身節儉勤於職事太宗亦以此稱之也

太官令

六典曰太官令供膳食之事丞為之貳凡祭之日則白卿

詣廚省牲鑊取明水於陰鑑取明火於陽燧帥宰人以鑿刀割牲取其毛血實之於豆遂烹牲焉又帥進饌者實簋簋設於饌幕之內

漢書百官表曰少府屬官有太官令一人丞一人

應劭漢官儀曰太官令兩梁官冠秩千石丞四人郡孝廉年五十清修聰明者光祿上名迺召拜皆秩四百石三歲為令以供養勞苦遷左丞有湯官丞掌諸甘肥有菓丞掌菓瓜菜茹薪炭

漢舊儀曰太官主飯肉湯官主酒漿皆令丞治大官湯官奴婢各三千人置酒皆緹繡音溝蔽膝綠幘

又曰太官上食黃鉞音口金飾器器中官私官上食用白銀鉞器如祠廟器云

謝承後漢書曰魯國陳政字叔方為太官令黃門郎與政

有隙因進御食以髮貫炙光武見髮勃斬政政曰臣有當死者三黑山出炭增冶吐炎焦膚爛肉而髮不消臣罪一也陝出佩刀砥礪五石虧肌截骨曾不能斷髮臣罪二也臣朗月書章奏側光讀經書且臨食與丞及庖人六目齊視不如黃門一人世罪三也詔赦之

魏略曰時苗爲壽春令遷爲太官令

後魏書曰毛循之能爲南人飲食手自煎調多所適意世祖親待之進太官尚書賜爵南郡公加冠軍將軍常在太官主進御膳○楊雄太官令箴曰時惟膳夫實司王饗祁祁庶羞口實是供羣物百品八珍清觴以御賓客以膳于王

王朗集曰朗爲大理時上主簿趙郡張登昔爲本縣主簿值黑山賊圍郡登與縣長王攜帥吏兵七十二人俱往赴

救與賊交戰吏兵散走攜殆見害登手格二賊以全攜命又守長夏逸爲督郵所枉登身授拷掠理逸之罪義濟二君宜加顯異黃初初詔曰登忠義彰著在職功勤名位雖卑直亮宜顯饗膳近任當得此吏今以登爲太官令

太平御覽卷第二百二十九

太平御覽卷二百二十九
職官部二十八
衛尉卿
公車令
宗正丞
廋令
武庫令
宗正卿
太僕卿
車府令
守官令
宗正少卿
乘黃令

太平御覽卷二百三十

職官部二十八

- 衛尉卿
- 公車令
- 宗正丞
- 廋令
- 武庫令
- 宗正卿
- 太僕卿
- 車府令
- 守官令
- 宗正少卿
- 乘黃令

衛尉卿

六典曰衛卿之職掌邦國器械文物之事摠武庫武器守
官三署之官屬少卿爲之貳凡大祭祀大朝會則供其羽
儀節鉞金鼓帷奕茵席之屬

漢書百官表曰衛尉秦官也掌宮門衛土屯兵漢因之景
帝初更名中大夫後元年改爲衛尉
東觀漢記曰光武二十三年太尉鮑昱兼衛尉永元三年

司徒丁鴻兼衛尉

後漢書曰銚音遙期字次况潁川人也拜衛尉卿期重於信義憂國忠主其有不得於心必犯顏諫諍續漢書曰陰興爲衛尉每諸將出征伐身行勞問無所愛惜

又曰馬光字叔山爲衛尉卿上以光謹勅小心周密畏慎特親異之

又曰竇固字孟孫爲衛尉卿兩宮宿衛見重當時仁厚謙恭甚有名稱

又曰趙喜字伯陽爲衛尉盡心事上夙夜匪懈母沒上䟽乞守服不許遣使釋服

又百官志曰衛尉卿秩中二千石掌宮門衛士公車令百官衛士左右都候宮掖門司馬皆屬焉

魏志曰辛毗爲衛尉清貧與徐邈胡質皆以憂國忘私不營產業賜穀二千斛錢三十萬布告天下

又曰田預爲并州刺史徵爲衛尉屢乞遜位司馬宣王以預克壯書論未聽預書荅曰年過七十而以居位譬猶鐘鳴漏盡夜行不休是罪人也遂因稱疾

又曰辛毗字佐治爲衛尉卿帝方修殿舍毗諫曰詩云民亦勞止汙可小康

吳志曰嚴峻孫權爲吳王及稱尊號峻常爲衛尉祿賜皆散之親戚知故家常不充

晉書曰石崇拜衛尉與潘岳諂事賈謐謐與之親善號二十四友廣成君每出崇降車路左望塵而拜其佞如此宋書曰南郡王義宣子恢爲侍中領衛尉晉氏過江不置衛尉世祖欲重城禁故復置衛尉自恢爲始也

唐書官品志曰衛尉卿位視侍中掌宮門屯兵卿每月丞
 每旬行宮徼糾察不法統武庫令公車司馬令
 漢官解詁曰衛尉主宮闕之內衛士於垣下為廬各有負
 部凡居宮中者皆置籍於門按其姓名有鑿巫儼人當入
 者本官長吏為封啓傳審其印信然後內之人有籍者皆
 復有符用木長二寸以所長官兩字為鐵印分符當出入
 者案籍畢復齒符乃引內之也其有官位得出入者令執
 御者各傳呼前後以相通昏□至晨分部行夜夜有行者
 輒前曰誰誰若此不懈終歲更始所以重慎宿衛也
 漢書舊儀曰衛尉寺在京內胡廣云宮闕之內衛士於周
 垣下為廬者若今之伏宿屋矣

武庫令

六典曰武庫令掌藏邦國之兵仗器械辨其名數以備國

用承為之貳

漢書百官表曰執金吾屬官有武庫令
 又曰杜欽為大將軍武庫令職閑無事欽所好也
 又曰武庫令一人昔武王伐紂散牛放馬倒載干戈韜以
 虎皮而藏諸武庫武庫之職由來尚矣
 續漢書曰武庫令一人秩六百石主兵器
 晉書曰樂廣欲會荆揚士人武庫令黃慶進陶侃於廣人
 或非之慶曰此子終當遠到復何疑也

守宮令

六典曰守宮令掌邦國供帳之屬辨其名物會其出入凡
 大祭祀大朝會及巡幸則設王公百官位於正殿南門外
 續漢書曰少府屬官有守宮令丞主御紙筆墨及財物諸
 用并封書泥之事

魏志曰荀彧字文若年少時南陽何顒異之曰王佐才也舉孝廉拜守宮令。董巴漢中宮傳曰守官禁內署令秩千石在省內用中人省外士人齊職儀曰守宮周掌宮之職王行為帷宮即其任也

公車令

漢書曰張釋之為公車令續漢書曰公車司馬令掌宮南門凡吏民上書四方貢獻及徵詣公車者皆掌之又曰周垂字子居拜侍御史公車司馬令不畏強禦以是見怨於幸臣應劭漢官儀曰公車司馬令周官也秩六百石冠一梁掌殿司馬門徹夜宮中天下上事及闕下凡所徵召皆摠領之李卻以公車司馬入為侍

宗正卿

六典曰宗正卿之職掌九族六親之屬籍以別昭穆之序并領崇玄署少卿為之貳

漢書曰宗正秦官也

應劭曰周成王時形伯入為宗正

掌親屬

又曰劉德字路叔修黃老術有智略少時數言時事召見甘泉宮武帝謂之千里駒昭帝初為宗正丞後為宗正卿德妻死大將軍欲以女妻之德不敢畏盛滿也

又曰劉向字子政元帝時蕭望之周堪薦向宗室忠直明經有行為宗正

東觀漢記曰劉般字伯興遷宗正在朝廷竭忠盡節勤身憂國夙夜不怠數納嘉謀州郡便宜清淨畏慎受職脩治振施宗族

又曰劉平字公子以仁孝著聞永平三年為宗正卿

後漢書曰劉軫字君文梁孝王胤爲宗正卒官遂代掌宗正焉

續漢書曰宗正卿一人秩二千石掌序錄王國嫡庶之次及諸宗室親屬遠近郡國歲計上宗室名籍○晉起居注曰咸寧元年以太中大夫王覽爲宗正卿

又曰太始二年以侍中中書監朱整爲宗正卿

後魏書曰杜銓初密太后父豹喪在濮陽世祖欲命迎葬於鄴謂司徒崔浩曰天下諸杜何處望高浩對京兆爲美世祖曰朕今方改葬外祖意欲取京兆社中長老一人以爲宗正命營護凶事浩曰中書博士杜銓其家今在趙卽是杜預之後於今爲諸杜最卽命詔之及見銓器貌瓌雅世祖感悅謂浩曰此眞吾所欲也以爲宗正
唐書官品志曰宗正卿位視列曹尙書主皇室外戚之籍

以宗室爲之

石氏星經曰宗正二星在帝座東南

山公啓事曰羊祜忠篤寬厚然不長理劇宗正卿缺不審可轉作否

宗正少卿

後魏職令曰宗正卿第四品上第二請用懿清和識參教典者先盡皇宗無則用庶姓

宗正丞

六典曰宗正丞掌判寺事

太僕卿

六典曰太僕卿掌邦國廐牧車輿之政令摠乘黃典廐典牧章府四署及諸監牧之官屬少卿爲之貳凡國有大禮及大駕行幸則供其五輅屬車之屬

尚書冏命曰穆王命伯冏為周太僕正伯冏臣名為太僕作大御中大夫也命汝作太僕正正于羣僕侍御之臣

周禮曰太僕掌正王之服位出入王之大命掌諸侯之復逆王眡朝前正位而退入亦如之建路鼓于太寢之門外而掌其政以待達窮者與遽令聞鼓聲則速逆御僕與御庶子祭祀賓客喪紀正王之服位詔法儀贊王牲事王出入則自左馭而前驅

漢書曰灌嬰自上初起沛常為太僕高祖世以太僕事惠帝崩以太僕事高后高后崩代王之來嬰與東牟侯入清宮以天子駕迎代王共立文帝復為太僕

又曰百官表曰太僕掌輿馬屬官有太廐未央廐家馬三令又車府路軫音靈騎馬駿馬四令丞又龍馬閑駒橐泉駒

駮丞萃五監長丞又邊郡六牧師苑令各三丞又牧橐昆蹄令丞皆屬焉

東觀漢記曰祭側界切彤膂力過人常貫三百斤弓入為太

僕從帝過孔子講堂帝指子路室曰太僕吾之禦侮也

後漢書曰徵祭彤為太僕彤在遼東幾三十年衣無兼副

顯宗既嘉其功又美彤清約拜日賜錢一百萬馬三疋衣被刀劔下至居屋什物大小無不悉備

續漢書曰趙岐字臺卿獻帝以為太僕持節安慰天下

又百官志曰太僕秩中二千石掌車馬天子出奉駕大駕

則馭

魏志曰國淵字子尼遷太僕居列卿位布衣蔬食祿賜散之舊故宗族以恭儉自守

又曰潘尼字正叔侍中為太僕造乘輿箴○漢舊儀曰太

僕牧師諸苑三十六所分布北邊以郎為苑監官奴婢三萬人分養三十萬頭擇取給六廐牛羊無數以給牲犧漢雜事曰石慶為太僕卿出上問車中幾馬慶以策數馬舉手曰六馬慶以兄弟中最為簡易而猶如此又曰公孫賀以太僕為丞相子敬聲代為太僕晉諸公贊曰郭展為太僕留心於養生是以廐馬充牣其後征吳得以濟事

唐書官品志曰太僕卿位視黃門侍郎統南馬牧左右牧龍廐內外廐丞

乘黃令

六典曰乘黃令掌天子車輅辨其名數與馴馭之法丞為之貳

宋書曰乘黃令晉官也主乘輿金根車及安車追鋒諸衆

車馬

齊職儀曰乘黃令乘黃獸名也龍翼馬身黃帝乘之而仙後人以名廐

廐令

六典曰典廐令掌繫飼馬牛給養雜畜之事丞為之貳

漢書曰太僕屬官有太廐未央廐家馬三令各五丞一尉又車府輅駟騎馬駿馬四令丞晉約曰漢儀注六廐名也主馬萬疋也又龍

馬閑駒橐泉如淳曰廐在橐泉宮下駒駮丞華五監長丞牧橐昆蹄

令丞應劭曰橐橐馳昆蹄好馬名也如淳曰因以名廐也武帝太初元年更名家馬

為桐馬應劭曰主乳馬取其汁桐治之味酢可飲因以名官桐動

又曰蘇武為移中監移中廐名音移

又日上官桀遷未央廐令上體不安及愈見馬瘦上怒曰汝以我不復見馬耶桀曰聖體不安日夜憂懼意誠不在

馬言未卒泣數行下上以爲忠

齊職儀曰諸廐有圉帥牧人養馬之官校人掌王之馬正也

車府令

六典曰車府令掌王公已下車輅辨其名數及馴馭之法丞爲之貳

史記曰趙高爲秦車府令

漢書百官表曰太僕屬官有車駕令一人六百石丞一人東觀漢記曰永平中車駕出信陽侯陰就干車騎突鹵薄車府令齊國徐匡鉤就車收送獄詔書譴匡匡自繫不出吳良上書信陽侯驕慢干突車騎無人臣禮大不敬匡執法守正而下獄臣恐陛下政化由是隳矣於是詔出匡左遷卽丘長

齊職儀曰車府署周有中車典輅之職辨五輅之制

太平御覽卷第二百三十

失其道民散久矣如得其情則哀矜而勿喜
韓詩外傳曰晉文公使李離爲理過聽殺人自拘於廷請
死於君君曰官有貴賤罰有輕重下吏有罪非子之罪也
離曰法失則刑失刑失則死臣官爲長不與下吏讓位爵
爲多不與下吏分利君以爲能聽微決疑故使臣爲理今
過聽殺無罪罪當死臣不能以虛自誣遂伏劍死君子曰
忠矣仁矣

家語曰季羔爲衛士師別人之足俄而衛有亂季羔逃別
者守門謂羔曰彼有致羔曰君子不踰又曰彼有竇羔曰
君子不隧又曰此有室季羔入焉既罷羔問曰吾親別子
之足而子逃我何也別者曰曩者君理人以法令先君後
臣欲臣之免也臣知之臨當論刑君愀然不樂見於顏色
臣又知之君豈私臣哉天生君子其道故然此臣之所以

脫君也孔子聞之曰善哉爲吏其用法一也思仁恕則樹
德加嚴暴則樹怨公以行之其子羔乎

史記天官書曰斗魁四星貴人之牢曰大理

漢書曰廷尉秦官掌刑辟有正左右監景帝中六年更名
大理武帝建元四年復爲廷尉

又曰于定國爲廷尉爲人卑恭九重經術其決獄平法務
在哀蠲罪疑從輕加審慎之心朝廷稱之曰張釋之爲廷
尉天下無冤人于定國爲廷尉人自以不冤

又曰朱博遷廷尉恐爲官屬所輕召見正監典法掾史謂
曰廷尉本起於武吏不明法律幸有衆賢亦何憂然廷尉
治部斷罪以來二十年亦獨耳剽日久剽劫也三尺律令

人事出其中試與正監共撰前代決事吏議難知者數十
事持問廷尉將爲諸君覆之正監條白博皆召掾史爲平

處其輕重十中八九官屬咸服

又曰張釋之為廷尉文帝嘗行有人從渭橋下出乘輿馬驚捕之屬廷尉釋之奏其犯蹕當罰金上怒釋之曰法者所與天下公共也方以其時誅之則已今已下廷尉廷尉天下之平也一傾天下用法皆為之輕重人安所措其手足乎後有盜高廟座前玉環者文帝令族之釋之奏當棄市上大怒釋之曰法如是也今盜宗廟器而族之如令愚人取長陵一抔土陛下何以加其法乎

又曰張湯為廷尉決大獄欲傳古義方請博士弟子理尚書春秋補廷尉史平亭疑法奏讞疑事必先為上分別其原以揚主之明言此自天子意非由有司也奏事有善則讓曰監掾史某所為也亭者平也均也又曰杜周為廷尉其治大斂張湯而善候伺上所欲客謂

周曰君為天下決平不循三尺法以三尺竹簡書法律令專以主意

為獄獄者固如是乎周曰三尺安出哉前主所是著為律後主所是疏為令當時為是何古之法乎至周為廷尉獄亦益多矣二千石繫者新故相因不減百餘人

又曰王先生者善黃老言處士也張釋之召居廷中王先生年老與釋之及公卿會廷中立王生襪解顧謂釋之為我繫襪釋之前跪而繫之既退或讓王生曰何辱張廷尉乎王生日廷尉方為天下名臣吾聊使繫襪欲重之諸公聞之賢王生而重張廷尉

又曰下邳翟公為廷尉賓客填門及免官門外可設雀羅後為廷尉乃署其門曰一死一生乃知交情一貴一賤交情乃見

又曰文帝初立聞河南守吳公治為天下第一故與李斯

同邑乃徵吳公爲廷尉

又曰孔光爲廷尉時定陵淳于長坐大逆誅長小妻乃始等六人皆以長事未發覺時弃去或更嫁及長事發丞相翟方進等議乃始等於法無以解請論光以爲夫婦之道有義則合無義則離乃始等或更嫁義已絕而欲以爲妻論殺之名不正不當坐有詔以光議定

東觀漢記曰陳寵爲廷尉有疑獄輒手筆作議所活者甚多

後漢書曰郭躬爲廷尉躬家代掌法務寬平乃條諸重文可從輕者四十一事奏之事皆施行著于令

又曰郭躬字仲孫爲廷尉正遷廷尉家代掌法子鎮自廷尉左監遷廷尉凡郭氏爲廷尉者七人

後漢書曰楊賜遷廷尉乃歎曰昔三后成功惟殷于人而

咎繇不與焉蓋委之也委耻也遂以代非法家固辭

謝承後漢書曰范延壽宣帝時爲廷尉時燕趙之間有三男共娶一妻生四子長各求離別爭財分子至聞于縣縣不能決斷讞之于廷尉於是延壽決之以爲悖逆人倫比之禽獸生子屬其母以子並付母尸三男子市奏免郡太守令長等無師化之道天子遂可其言

又曰傅賢遷廷尉素廉正自掌法官無私門賓客公卿宴會要請不往自以爲貧無以報荅其施常垂念刑法務從輕比至斷獄邊徇流涕在位四年治獄稱平

華嶠後漢書曰吳雄字季高以明法律斷獄平桓帝時爲廷尉雄子訢孫恭三世相承爲廷尉爲名法家

漢官儀曰光武時有疑獄見廷尉曹史張禹所問輒對處當詳衷於是冊免廷尉以禹代之雖越次而授亦足以厲

其臣節也

魏志曰高柔字文惠陳留圉人遷廷尉頃之護軍營士竇禮近出不還營以爲亡表言逐捕沒其妻盈及男女爲官奴婢盈連至州府稱寃自訟莫有省者乃辭詣廷尉柔問曰汝何以知夫不亡盈垂泣對曰夫少單特養一老嫗爲母事甚恭謹又哀兒女撫視不離非是輕狡不顧室家者也柔重問曰汝夫不與人有怨讎乎對曰夫良善與人無讎又曰汝夫不與人交錢財乎對曰嘗出錢與同營士焦子文外求不得時子文適坐小事繫獄柔乃見子文問所坐言次日汝頗曾舉人錢否子文曰自以單貧初不敢舉人物也柔察子文色動遂曰汝昔舉竇禮錢何言不舉耶子文惟知事露應對不次柔曰汝已殺禮便宜早服子文於是叩頭具首殺禮本末埋藏所柔便遣吏卒承子文辭

往掘卽得屍詔書復盈母子爲平民班示天下以禮爲戒又曰高柔字文惠遷廷尉時獵法甚峻而宜陽典農劉龜竊於禁內射兔其功曹張京詣校事言之帝匿名收龜付獄柔請告者名帝大怒曰劉龜當死乃敢獵吾禁地送龜廷尉廷尉便當考掠何復請告者名吾豈妄收龜耶柔曰廷尉天下之平也安得以至尊喜怒而毀法乎重復爲奏辭旨深切帝意寤乃下張京名卽還訊各當其罪又曰鍾毓遷廷尉聽君父已沒臣子得爲理謗及士爲侯其妻不復改嫁毓所創也

晉書曰孔坦字君平遷侍中廷尉多平正當法合人情而時勢要自以愛憎爲斷坦意不得皆行也晉中興書曰范堅字子常爲廷尉奏主典吏邵廣盜官幔合布四十疋依律棄市廣息雲宗二人自沒爲官奴婢以

贖父尚書議可特聽堅駁之曰此爲施一恩於今開萬怨於後顯宗從之正廣刑
又曰王彪之遷廷尉時永嘉太守謝毅赦後殺郡人周矯矯從兄球詣州訴寃揚州刺史殷浩遣從事收毅付廷尉彪之以球爲獄主身無王爵非廷尉所料不肯受與州相反覆穆帝發詔令受之彪之又上疏執據時人云張釋之以來復見斯事
後魏書曰崔光詔遷廷尉卿時秘書監祖瑩以贓罪被劾光韶欲致之重法太尉城陽王徽尚書令臨淮王彧吏部尚書李神儁侍中李彧並勢望當時皆爲瑩求寬光韶正色曰朝賢執事於舜之功未聞有一如何反爲罪人言乎其執意不回如此
隋書曰文帝時議置六卿將除大理盧思道奏曰省有駕

部寺留太僕省有刑部寺除大理斯則重畜產而賤刑名也

又曰楊注字元度守大理卿注視事二日帝將親省囚徒其時繫囚二百餘人注通宵究審詰朝而奏曲盡事情一無遺誤帝甚嘉之

唐書官品志曰廷尉卿梁國初建曰大理天監元年復改爲廷尉有正監平三人元會廷尉三官與建康三官皆法冠玄衣朝服以監東西中華門手執方木長三尺方一寸謂之執方

又曰郎楚之武德初爲大理卿與太子少保李綱侍中陳叔達撰定律令

又曰劉德威授大理卿太宗嘗問之曰近來刑網稍密其過安在德威奏言誠在主上不由臣下人主好寬則寬好

急則急律文失入減三等失出減五等今則反是失入則無辜失出獲大罪所以吏各自愛競執深文非有教使之然畏罪之所致耳陛下但捨所急則寧失不經復行於今日矣太宗深然之

又曰高宗問大理唐臨獄繫囚之數臨對曰見囚五十餘人唯二人合死上聞囚數不多怡然形於顏色謂臨曰昔東宮卿已事朕朕承大位卿又居近職以疇日相委故授卿此任然爲國之要在於刑法刑急則人殘法寬則失罪務令折中稱朕意焉

又曰張文瓘爲大理卿旬日決遣疑獄四百餘條其得罪者皆無怨言文瓘嘗有疾繫囚相與設齋以禱焉尋拜侍中兼太子賓客大理囚一時慟哭其得人心如此

又曰大理卿表仁敬暴卒繫囚聞之皆慟哭悲歌曰天不

恤冤人兮何奪我慈親兮有理無申兮痛哉安訴陳兮

又曰龍朔二年改大理卿爲詳刑寺正卿

唐新語曰唐臨爲大理卿初莅職斷一死囚先時坐死者十餘人皆它官所斷會太宗幸寺親錄囚徒它官所斷囚皆稱冤不已臨所斷者嘿而無言太宗怪之問其故囚對曰唐卿斷臣必不枉濫所以絕意太宗歎息久之曰爲獄固當若是囚遂見原

五代史後唐書曰長興二年八月勅今後大理寺官負宜同臺省官例升進其法直官比禮直官任使

會稽典錄曰盛吉字君達爲廷尉性多哀憐其妻謂吉曰君爲天下執法不可使一人濫罪殃及子孫其囚無背嗣者令其妻妾得入使有遺類視事十二年天下稱有恩

又曰董昆字文通餘姚人也遷廷尉卿持法清峻不發私

書

又曰盛吉拜廷尉吉性多仁恩務在哀矜每至冬日罪囚當斷其妻執燭吉手持丹筆夫妻相向垂泣會稽後賢記曰孔坦遷廷尉獄多囚繫坦到官躬執辭狀口辨曲直小大以情不加楚撻每臺司錄獄無所顧問皆面決當時之事

天文錄曰平星主建廷平主平天下之獄事若今廷尉之象故星讚曰平星執法正綱紀也

文子曰臯陶喑爲大理天下無虐刑有貴乎言者也

說苑曰楚令尹子文之族有干法者廷理拘之聞其令尹之族也而釋之子文召廷理而責之遂致其族人於廷理曰不是刑吾將死廷理懼遂刑其族人成王聞之不及履而至于子文之室曰寡人幼小置廷理失其人以違夫子

之意於是黜廷理而尊子文之意反內政

新序曰楚昭王時石奢爲理有殺人者奢追之則其父也奢曰以父成政不孝也不行君法非忠也遂刎頸而死摯虞新禮議曰故事祀臯陶於廷尉寺祀以社日新禮改以孟秋之月以應秋政

大理少卿

後魏職令曰廷尉少卿第四品上第二清用思理平斷明刑識法者

北齊書曰宋世軌爲廷尉少卿時大理正蘇珎之亦以平幹知名寺中爲之語曰決定嫌疑蘇珎之視表見裏宋世軌謂之寺中二絕卒官廷尉御史諸囚皆哭曰宋廷尉死我等豈有生路也

隋書曰趙綽爲大理少卿侍郎辛亶嘗衣緋褌俗云利官

文帝以爲厭盡將斬之綽曰據法不當死臣不敢奉詔上怒甚令斬綽綽解衣當斬上使人問曰竟如何綽曰執法不敢惜死上良久釋之他日又令斬二人綽曰此人坐當杖殺之非法上曰不關卿事綽曰陛下置臣法司欲誤殺人豈得不關臣事上曰撼大木不動者當退綽曰臣翼感天心何論大木上乃止時薛胄爲大理卿胄斷獄以情而綽守法俱爲稱職

又曰源師煬帝卽位拜大理少卿帝在顯仁宮勅宮外衛士不得輒離所守有一主帥私令衛士出外帝付大理繩之師據律奏徒帝令斬之師奏曰此人罪誠難恕若陛下初便殺之自可不關文墨旣付有司義歸恒典脫宿衛近侍者更有此犯將何以加之帝乃止
唐新語曰太宗嘗謂侍臣曰大理之職人命所懸當須妙

選正人用心存法無過戴胄者乃以爲大理少卿
又曰徐有功遷司刑少卿時周興來俊臣等羅告天下衣冠遇族者數千百家有功居司刑平反者不可勝紀時人方之于定國

大理正

六典曰大理正掌參議刑獄詳正科條之事凡六丞斷罪不當則以法正之
禮記曰成獄辭史以獄成告於正正聽之鄭玄注云於周禮鄉師之屬今漢有正平丞秦所置也
東觀漢記曰何敞祖比干遷廷尉正張湯爲廷尉以殘酷見任增飾法律比干嘗爭之存者千數
後漢書曰黃霸字次公宣帝在人間時知百姓苦吏聞霸理法平召爲廷尉正及夏侯勝非議下廷尉獄霸從勝受

尚書

謝承後漢書曰陳琳字伯真橋玄表琳明律令徵拜廷尉

正
魏志曰司馬芝字子華遷大理正有盜官練置都廩上者
吏疑女工收以付獄芝曰夫刑罰之失失在苛暴今賊物
先得而訊其辭若不勝掠或至誣服誣服之情不可以折
獄且簡而易從大人之化也不失有罪庸世之治耳今宥
所疑以隆易從之義不亦可乎太祖從其議

晉書曰江統字元應爲廷尉正作三刑議

又曰廷尉三官通視南臺持書舊尚書郎下遷梁制服獬
象冠介幘阜衣銅印墨綬

晉中興書曰顧榮字彥先入洛以南士秀望累遷廷尉正
南史曰顧協少清介有志操初爲廷尉正冬服單薄寺卿

蔡法度欲解褐與之憚其清嚴不敢發口謂人曰我願解
身上襦與顧郎顧郎難衣食者晉不敢以遺之

大理丞

六典曰大理丞掌分判寺事凡有犯皆據其本狀以正刑
名徒已上各呼囚與其家屬告以罪名問其狀款不伏則
聽自理

唐書曰杜景佺徐有功爲司刑丞與來俊臣侯思止同理
獄人稱之曰遇徐杜必生遇來侯必死

唐新語曰李日知爲司刑丞嘗免一死囚少卿胡元禮異
判殺之與日知往復至于再三元禮怒遣府史謂日知曰
元禮不離刑曹此囚無不死法日知報曰日知不離刑曹
此囚無死法竟以兩問日知果直

廷尉監

漢書曰邴吉字少卿稍遷廷尉監治巫蠱

謝承後漢書曰陳咸字子威爲廷尉監執獄多恩議人常從輕比多所全活皆稱其恩

晉起居注曰廷尉監陸鸞上表求增築訊堂圖畫先賢像詔許之

廷尉評

六典曰大理評事掌出使推按凡承制而出推訊長吏據狀令停務及禁錮者先請魚書以往據所受之狀鞫而盡之若詞有反覆不能首實者則依法拷之凡大理斷獄皆連署焉

漢書曰宣帝詔曰今遣廷吏與郡鞠獄任輕祿薄其爲置正平員四人其務平之丞郡太守鄭昌上言曰聖王立法明刑者非以爲理救衰亂之起也今明主躬垂明德不置

廷平獄將自正若開後嗣不若刪定律令律令一定愚人知所避就姦吏無弄法今不止其本而置廷平以理其未代衰德怠則廷平將播權而爲亂首也宣帝始置左右平而三輔決錄注何比于漢武時爲廷尉右平謬矣
又曰馬宮字游卿行能高潔遷廷尉平

又百官表曰宣帝地節三年初置左右平四人秩六百石晉中興書曰顧榮字彥先遷廷尉平時趙王欲誅淮南王允官屬下廷尉議罪榮具明刑理不宜廣濫倫意解賴榮濟者甚衆

隋書曰廷尉平置一人第六品下後改爲評事

唐新語曰敬昭道爲大理評事時沂州有反者誑誤坐者四百餘人將隸于司農未即路繫在州獄昭道援赦文判而免之時宰相責大理奈何免反人家口大理羣官失色

引昭道以見執政怒而責之昭道曰赦云見禁囚徒反者
 家口繫在州獄此即見禁也反覆詰對至于五六執政無
 以奪之誑誤者悉免
 三輔決錄注曰茂陵何比于漢武時丞相公孫弘舉為廷
 尉右平獄無冤民號曰何公

太平御覽卷第二百三十一

引昭道以見執政怒而責之昭道曰赦云見禁囚徒反者
 家口繫在州獄此即見禁也反覆詰對至于五六執政無
 以奪之誑誤者悉免
 三輔決錄注曰茂陵何比于漢武時丞相公孫弘舉為廷
 尉右平獄無冤民號曰何公

太平御覽卷第二百三十一

職官部三十

鴻鴻卿

鴻臚少卿

典屬國

司農卿

司農少卿

上林苑令

太倉令

導官令

太府卿

太府少卿

市令

平准令

左右藏令

鴻臚卿

六典曰鴻臚卿之職掌賓客及凶儀之事領典客司儀二
 署以率其官屬而供其職務少卿為之貳凡四方夷狄君
 長朝見者辨其等位以賓待之凡二王之後及夷狄君長
 之子襲官爵者皆辨其嫡庶詳其可否若諸蕃大酋渠有
 封建禮命則受冊而往其國

韋昭辨釋名曰腹前肥者臚言以京師爲心腹王侯外國爲四體以養之也辯云鴻臚本故典客掌賓禮鴻大也臚陳序也欲以大禮陳序賓客也

漢書曰田序字子公連擒大姦勸爲大鴻臚

又曰典客秦官掌諸侯歸義蠻夷有丞景帝中六年更名大行令武帝太初元年更名大鴻臚

東觀漢記曰大鴻臚漢舊官建武元年復置屬官有丞一人大行丞一人有理禮負四十七人主齋祠償贊九賓之禮

續漢書曰大鴻臚卿一人中二千石諸王入朝當郊迎典其禮儀及郡國上計并屬焉皇子拜王贊授印綬及拜諸侯嗣子及四方夷狄封者鴻臚召拜之

謝承後漢書曰陳紀字元方遭父太丘長寔憂嘔血絕氣

豫州嘉其至行表上尚書圖畫百城以勵風俗表紹以太尉讓紀紀不受拜大鴻臚卒官子羣爲三公天下以爲公慙卿卿慙長

又曰白嵩字季山爲濟南相甘露降於郡安帝嘉其致瑞徵拜大鴻臚

漢官解詁曰鴻聲也臚傳也所以傳聲贊導九賓也

又曰昔唐虞賓于四門此則禮賓之制與鴻臚之任亦同漢雜事曰蕭□爲陳留太守入爲鴻臚不任賓贊還官

魏志曰崔林字德儒清河東武城人也遷大鴻臚龜茲王遣侍子來朝朝廷嘉其遠至褒賞其王甚厚餘國各遣子來朝開使連屬林恐所遣或非真的權取疏屬賈胡因通使命利得印綬而道路護送所損滋多勞所養之民資無益之事爲夷狄所笑此曩時之所患也乃移書燉煌諭旨

并錄前世待遇諸國豐約故事使有恒常
魏略曰韓宣字景然爲大鴻臚始南陽曲阜韓暨以宿德
在宣前爲大鴻臚及宣在官亦稱職故鴻臚中爲之語曰
大鴻臚小鴻臚前後治行曷相如
蜀志曰杜瓊字伯瑜後主立爲大鴻臚爲人靜嘿少言闔
門自守不與世事
吳志曰張儼字子節吳人也弱冠知名早歷顯位以博聞
多識拜大鴻臚使于晉皓謂儼曰南北通好以君有出境
之才故相屈行對曰皇皇者華臣蒙其榮懼無古人延譽
之美磨厲鋒鏑思不辱命既至車騎將軍賈充尚書令裴
秀侍中荀勗等欲傲以所不知而不能屈尚書僕射羊祜
尚書何植並結縞帶之好
唐書官品志曰鴻臚卿位視尚書右丞掌導護贊拜

山濤啓事曰鴻臚職主胡事前後爲之者率多不善丁今
缺當選御史中丞刀攸不審可爾不

鴻臚少卿

後魏職令曰鴻臚少卿第四品上第二清用雅學詳當明
樞達理者

隋書曰煬帝時蠻夷朝貢前後相屬帝從容謂宇文述虞
世基等曰四夷率服觀禮華夏鴻臚之職須歸令望寧有
多才藝美容儀可以接對賓客者爲之乎咸以蘇夔對帝
然之即日拜鴻臚少卿

典屬國

漢書曰武帝以移音修中監蘇武爲典屬國

又曰宣帝甘露二年以常惠爲典屬國

又曰典屬國秦官掌蠻夷降者成帝河平元年省併大鴻

廬

司農卿

六典曰司農卿之職掌邦國倉儲委積之事總上林太倉鈞盾導官四署與諸監之官屬謹其出納而修其職務少卿爲之貳凡京都百司官吏祿廩皆仰給焉

周禮曰冢宰有太府下大夫鄭玄注曰太府爲王治藏之長若今司農矣

史記曰韓信歸漢漢以爲治粟內史

漢書曰治粟內史秦官掌穀貨景帝更名大農令武帝更名大司農

又曰鄭當時字莊爲司農門下客至無貴賤無留門者執賓禮以下人山東諸公翕然稱莊上曰吾聞鄭莊行千里不賈糧

又曰朱邑爲北海太守以治行第一入爲大司農身爲列卿居處節儉性公正不可交以私天子器之朝廷敬焉及卒詔稱揚其節行賜邑子黃金百斤以奉其祭祀

又曰田延年爲大司農坐盜都內錢三千萬自殺

又曰平帝元始元年改大司農曰羲和以劉歆爲之

東觀漢記曰劉據爲大司農以職事被譴召詣尚書將加捶撻尚書左雄諫帝曰九卿位亞三公行則鳴玉孝明永平始加扑罰非古制也帝從之卿於是始免朴捶

又曰高詡字季回以儒學徵拜大司農在朝以清白方正稱

又曰羊融字子優爲大司農性明達稱爲名卿

續漢書曰李固爲大司農上信闡官天下牧守多其宗親舊故及受貨賂有詔特拜不由選試亂生彌甚固乃上表

具陳盜賊所以興由官非其人也

又曰大司農卿一人中二千石掌諸錢穀金帛

又曰趙典字仲經爲大司農閉門却掃非德不交

又曰耿國字叔慮爲大司農曉邊事能論議數上便宜事

天子器之

又曰鄭玄公車徵爲大司農給安車一乘所過長吏送迎

張璠漢記曰陳寵爲廣漢太守風聲大行入爲大司農水

應劭漢官儀曰大司農古官也唐虞分命羲和四子敬授

民時高祖受命懲秦之弊與民休息逮至文景國家無事

家給人足京師之錢累百巨萬貫朽而不可校太倉之粟

陳陳相因充溢積腐敗而不可食

魏志曰梁習爲并州二十餘年政治爲天下最乃徵拜大

司農

吳志曰樓玄爲大司農玄從九卿持刀侍衛正身率衆奉

法而行應對切直數廷皓意漸見責怒後人誣曰玄與賀

劭相逢駐共耳語大笑謗訕政事遂被詔詰責送付廣州

晉陽秋曰司農相範字元則出奔謂曹爽云大司農印在

吾手中所在得開倉而食

宋書曰大司農卿一人書稱棄后稷其職也

齊職儀曰司農卿耕籍則掌其禮儀

隋書曰趙元淑轉潁川大守甚有惠政因入朝會司農不

時納諸苑祖穀元淑奏之帝謂元淑曰如卿意者幾日當

了元叔曰如臣意不過十日帝即日拜元淑爲司農卿納

天下租如言而了帝悅焉

唐書官品志曰司農卿位視散騎常侍主農功倉廩統太

倉導官籍田上林令

韓楊天文要集曰天倉者大司農也

異苑曰吳郡岑淵為吳郡時大司農卿造碑注在江桑湖西太元中村人見石龜載碑從田中出還其先處萍藻猶着腹下

史游急就篇曰司農少府國之泉也

後魏職令曰司農少卿

唐書曰韋弘機為司農少卿受詔檢校東都營田園苑之事高宗謂之曰兩都是朕東西二宅也今之官館隋代所造歲序既淹漸將頽頽欲有修造又費財力如何弘機奏曰臣任司農向已十年前後省費今見貯錢三十萬貫若以供葺理可不勞而就也上大悅

上林苑令

漢書百官表曰水衡屬官有上林令

續漢書曰上林苑令秩六百石主苑中禽獸有民居皆主之捕得獸送太官

李邵別傳曰邵以郎謁者為止林苑令

楊雄上林苑令箴曰芒芒天田芃芃作穀山有陵陸野有林麓夷原汗藪禽獸攸伏魚鼈以時芻蕘咸植國以殷富民以家給

太倉令

六典曰太倉署令掌九穀廩藏之事丞為之貳凡鑿窖置屋皆銘甄為庾斛之數與其年月日受領粟官吏姓名又立碑如其銘焉

漢書曰淳于意為齊太倉令

續漢書曰太倉令一人秩六百石主受郡國轉漕穀

梁翼別傳曰太倉令秦宮出人翼妻壽所語言飲食獨往
獨來屏去御者宮翼壽姊夫宗忻不知書因壽氣力起家
拜太倉令

齊職儀曰太倉令周司徒屬官有廩人倉人則其職也

六典曰導官令

六典曰導官令掌導擇米麥之事凡有九穀之用皆隨其
精麤差其耗損而供之

漢書百官表曰少府屬官有導官如導曰太官
之別主酒也

續漢書曰導官令一人春御米及作乾糲導擇也

太府卿

六典曰太府卿之職掌邦國賦貨之事摠京都四方平准
左右藏常平八署之官屬舉其綱目修其職務少卿爲之
貳以二法平物一曰度量二曰權衡

周禮曰天官屬有太府下大夫掌貢賦受其貨賄之人

梁書曰天監七年置太府班第十三掌金帛府帑統右藏
令上庫丞太市南市北市令關津亦皆屬焉

後魏書曰楊播字延慶弘農華陰人也播少脩勅奉親盡
禮累遷右衛將軍從車駕南巡到懸瓠除太府卿

唐書曰楊崇禮爲太府少卿雖錢帛充仞丈尺閒皆躬自
省閱時議以爲稱職擢拜太府卿每歲勾剥省便常出數
百萬貫在職二十年公清如一時太平日久御府財物山
積以爲經楊卿者無不精好

太府少卿

唐書官品志曰太府卿位視宗正掌金帛府帑統右藏令
後魏職令曰太府少卿第四品上士人清官用勤篤有幹
細務無滯者

唐新語曰狄光嗣仁傑長子也睿宗朝起復除太府少卿光嗣頗表不起乃降勅朕念卿家門志於王室奪卿情理以荅殊恩卿屢表固陳詞理懇至循環省覽有足可矜今遂所請用勸浮薄待卿情禮云畢更俟後命仍編入史

市令

六典曰京都諸市令掌百族交易之事丞爲之貳凡建標立候陳肆辯物以二物平市謂稱以格也以三賈均平市爲精上賈次爲中賈麤爲下賈凡賣買不和而攢固攢謂專略其利及更出固謂鞏固其市開閉共限一價謂賣物以賤爲貴買物以貴爲賤也若參市而規自入者並禁之謂在旁高下其價以相惑亂

史記曰司馬談祖爲漢市長

漢書百官表曰內史屬官有長安市長又長安四市令長丞屬左馮翊

東觀漢記曰祭遵從征河北爲軍市令舍中見犯法違格殺之上怒命收遵時主簿陳副諫曰明公常欲衆軍整齊今遵奉法不避是教令行也上乃貫之以爲刺姦將軍語諸將曰當備祭遵吾舍中見犯今尚殺之必不私諸卿也晉書曰石苞賣鐵鄴市市長沛國趙元儒名知人見而異之便與結交歎其遠量當至公輔齊職儀曰市令周有司廛肆師司市皆其任也

平準令

六典曰平準令掌供官市易之事丞爲之貳凡百司不任用之物則以時出貨其沒官物者亦如之韋昭辯釋名曰釋云平準令主染色色有常平之法準的之也辯云主平物價使相依準

史記曰桑弘羊以物多騰躍請置平準於京師受天下委

輸盡籠天下之貨物貴則賣之賤則買之如此則富商大賈無所牟大利矣始置平準焉

漢書百官表曰司農屬官有平準令丞
漢書曰趙廣漢清潔下士有名譽州舉茂才拜平準令
續漢書曰平準令六百石
齊職儀曰染署掌染繒色少昊置五雉爲工正翬雉氏設五色之工周有染人之職掌絲帛以爲服

左右藏令

六典曰左藏令掌邦國庫藏之事丞爲之貳凡天下賦調先於輸場閱其合尺度斤兩者卿及御史監閱然後納于庫藏皆題以州縣年月以別麤良辯新舊也
又曰右藏署令掌邦國寶貨之事丞爲之貳凡四方所獻金玉珠貝玩好之物皆藏之出納禁令如左藏之職

齊職儀曰右藏庫周天府內府之任天府物所藏也外府掌邦布之出入以待王用後漢中藏府令丞掌幣帛金銀諸物晉置中黃左右藏

太平御覽卷第二百三十二

又曰羊祜為黃門郎陳留王立以少帝不願為侍臣徙為祕書監

又曰惠帝永平元年詔曰祕書監綜理經籍考校古今課試署吏領有四百人宜專其事

鄧粲晉紀華譚為祕書自負宿名意每怏怏嘗從容謂上曰臣老於祕閣矣汲黯之言復存今日上不悅

晉諸公讚曰荀勗領祕書監太康二年汲郡冢中得竹書勗躬自撰次注寫以為中經列於祕書經傳闕文多所證

明

又讚曰庾峻自司空長史遷祕書監幽讚符命天文地理因有述焉

何法盛晉中興書曰孫盛字安國為祕書監篤尚好學自少及長常手不釋卷既居史官乃著三國陽秋

沈約宋書百官志曰祕書監丞各一人郎四人魏武建國有祕書令左右丞黃初中分祕書立中書而祕書之局不廢昔漢武帝建藏書之冊置寫書之官於是天下文籍皆在天祿石渠延閣廣內祕室之府謂之祕書至成哀世使劉向父子以本官典其事至于後漢則圖籍在東觀有校書郎又有著作郎傳毅馬融之徒多為校書郎又蔡邕從而入東觀著作復拜尚書選入東觀著作邕既已為尚書郎議郎知是著作郎也又曰碩學達官往往典校祕書如向歆故事或但校書東觀或有兼撰漢記也

梁書曰任昉字彥昇為祕書監自齊永元以來祕閣四部篇卷紛雜昉手自讎校由是篇目定焉

後魏書伊馥世祖欲拜馥為尚書郡公馥辭曰尚書務勞公爵至重非臣年少愚近所宜荷任請收過恩世祖問其所欲馥曰中祕二省多諸文士若恩矜不已請參其次世

祖賢之遂拜爲中護將軍祕書監

隋書曰柳詵煬帝嗣位拜祕書監封漢南縣公帝退朝之後便命入閣言宴諷讀終日而罷帝每與嬪后對酒時逢興會輒遣命之至與同榻共席恩若友朋帝猶恨不能夜召於是命匠刻木偶人施機關能坐起拜伏以像於詵帝每在月下對酒輒令宮人置之於坐與相讎酢而爲權笑唐書曰魏徵爲祕書監奏引學者校定四部書自是祕府圖籍粲然畢備

劉歆七略曰武帝廣獻書之路百年之間書積如丘山故外有太常太史博士之藏內則延閣廣內祕室之府魚豢典略曰芸臺香辟紙魚蠹故藏書臺稱芸臺三輔黃圖曰未央宮東有麒麟殿藏祕書即揚雄校書之處也

王充論衡曰蘭臺之官監國得失也

通典曰祕書省但主書寫勘校而已雖非要劇然好學君子亦多求爲之

溫嶠舉荀崧爲祕書監表曰夫國史之興將以明得失之跡謂之實錄使一代之典煥然可觀散騎常侍崧文質彬彬思義通博歷位先朝莅事以穆宜掌祕奧宣明史籍王肅表曰青龍之末主者啓選祕書監詔祕書騶吏以上三百餘人非但學問義理當聞有威嚴能檢下者詔肅以常侍領焉

又王肅論祕書不應屬少府表曰魏之祕書卽漢之東觀郡國稱敢言之上東觀耳自大魏分祕書而爲中書以來傳緒相繼于今三監未有隸名於少府者也今欲使臣編名於騶隸言事於外府不亦墮朝章而辱國典乎太和中

蘭臺祕書爭議三府奏議祕書司先生之載籍掌制書之
典謨與中書相亞宜與中書爲官聯
華嶠集詔曰尚書嶠體素弘簡文雅該通經覽古今博聞
多識屬書實錄有良史之志故轉爲祕書監其加散騎常
侍使中書散騎著作及治禮者律天文數術南省文章門
下撰集皆典領之嶠表伏見詔書以臣爲祕書監加位常
伯昔劉向父子世典史籍馬融通博三入東觀非臣膚淺
所敢投跡

唐書太宗正授顏師古祕書監制曰祕書望華史官任重
選衆而舉歷代攸難守祕書監顏師古體業淹和器周詳
敏學該流略詞兼典麗職司圖書亟經歲序朱紫旣辨著
述有成宜正名器允茲望實可祕書監

祕書少監

唐書周思茂者貝州漳南人少與弟思鈞俱早知名自右
史轉太子舍人與范履冰在禁最蒙親遇至於政事損益
多參預焉累遷麟臺少監崇文館學士垂拱四年下獄死
又曰王紹宗揚州江都人也遷祕書少監仍侍皇太子讀
書紹宗性澹雅以儒素見稱當時朝廷之士咸敬慕之張
易之兄弟亦厚之易之伏誅紹宗坐以交往見廢
又曰德宗以左諫議大夫史館修撰張薦爲祕書少監修
撰如故時裴延齡貴欲異同宰府乃言於上曰諫議大夫
論朝廷得失之官史館修撰書朝廷得失之事則領史職
者不宜爲諫官故有斯命

祕書丞

魏志曰武帝置祕書左右丞以劉放爲祕書左丞孫資爲
祕書右丞

魏略曰薛夏字宣聲天水人也博學有才華天水舊有姜任閭趙四姓常推於郡中而夏爲單家不爲降屈四姓欲治之夏乃遊逸東詣京師太祖宿聞其名甚禮遇之文帝又嘉其才黃初中爲祕書丞帝常與夏推論書傳未嘗不終日也每呼之不名而謂之薛君夏居甚貧帝又顧其衣薄解御袍賜之其後征東將軍曹休來朝時帝方與夏有所諮論而外啓休到帝引入坐定帝顧夏目之於休曰此君祕書丞天水薛宣聲也宜共談其見遇如此

魚豢魏略曰薛夏爲祕書丞時祕書嘗以公事移蘭臺蘭臺自以臺也祕書丞特爲署耳謂夏不得儀當有坐者夏報曰蘭臺爲外臺祕書爲內閣臺也閣也何不相移之有蘭臺無以折之

又曰嚴苞以高才黃初中入爲祕書丞數奏文賦帝甚異

之

晉書嵇紹以父得罪靖居私門山濤領選啓武帝曰康誥有言父子罪不相及嵇紹賢侔缺宜加旌命請爲祕書郎帝謂濤曰如卿所言乃堪爲丞何但郎也乃發詔徵之起家爲祕書丞

王隱晉書曰庾峻字山甫博學有才爲祕書丞遍觀古今聞見益優

虞預晉書曰何植字元幹廬江人也爲尚書郎特詔參祕書丞祕書本有一丞時尙未轉遂以植爲右丞右丞之置自植始也

檀道鸞晉陽秋曰太元十八年王謐爲祕書丞乃表前尚書殷允中書郎張敞太子後率郗儉之故太常栢石秀是多書之家請祕書郎分局採借

齊書曰王儉字仲實爲祕書丞上表求校墳籍依七略撰七志四十卷獻之

梁書曰張率字士簡吳郡人遷祕書丞高祖曰祕書丞天下清官東南胷緒未有爲之今以相胤爲卿定名譽

齊職儀云祕書丞銅印墨綬

南史劉孝綽遷祕書丞武帝謂舍人周捨云第一官當用第一人故以孝綽居此職

後魏書李彪字道固遷祕書丞分領著作事自文成帝已來至於大和崔浩高允著述國書編年序錄爲春秋之體遺落時事三無一存彪與祕書令高祐始奏遷固之體創爲紀傳表志之目焉

又曰李輔子伯尚少有重名高祖每云此李氏之千里駒勅撰太宗起居注尋遷祕書丞

後周書曰柳虬爲祕書丞時祕書雖領著作不參吏事自虬爲丞始令監掌焉

王肅論祕書表云青龍中議祕書丞郎與博士議郎同職近日月宜在三臺上

又曰祕書丞郎宜比尚書郎侍御史今侍御史乘犢車奏事用尺一祕書丞郎乘鹿車猶用尺奏恐非陛下崇儒之本意也

祕書郎

六典曰祕書郎四人從六品上晉起居注云武帝遣祕書圖書分爲甲乙景丁四部使祕書郎各掌其一焉

魏志曰王基字伯輿東萊人也時青土初定刺史王凌特表請基爲別駕後召爲祕書郎凌復請還頃之司徒王朗辟基凌又不遣則書劾州曰取宿衛之臣留祕閣之吏所

希聞也凌猶不遣凌流稱青士蓋亦由基協和之輔也
又曰鍾會字士季敏惠夙成時蔣濟著論謂觀其眸子可
以知人會年五歲見濟濟大奇之正始中以賜官郎中爲
祕書郎

蜀志曰郗正字令先安貧好學博涉墳籍弱冠能屬文入
爲祕書史轉令史遷祕書郎性澹於榮利九軌文章自司
馬王楊班傳張蔡之儔遺文篇賦及當世美書善論益部
有者則鑽鑿推求略皆寓目

王隱晉書曰鄭默字思元爲祕書郎刪省舊文除其浮穢
時陳留虞松爲中書令謂默曰而今而後朱紫別矣

又曰左思專思三都賦杜絕人事自以所見不博求爲祕
書郎

虞預晉書曰司馬彪少篤學不倦好色薄行不交人事專

精學問太始中爲祕書郎後轉爲丞

晉太康起居注曰祕書丞栢石綏啓校定四部書詔郎中
四人各掌一部

晉令云祕書郎掌中外三閣經書覆校闕遺正定脫誤
沈約宋書曰祕書郎四人後漢校書郎也

又曰蕭惠開雖貴戚而車服簡素初爲祕書郎祕書著作
並名家年少惠開意趣與之多不同比肩或三年不共語
宋書曰王敬弘子恢之爲祕書郎使求爲奉朝請與恢之
書曰祕書有限故有競朝請無限故無競吾欲使汝處無
競之地文帝許之

梁書曰張纘字伯緒爲祕書郎固求不遷欲遍觀閣內圖
籍

後魏書高謐字安平有文武才度天安中以功臣子召入

禁中除祕書郎典祕閣蓋以墳典殘毀奏廣訪郡邑大加繕寫由是代京圖籍莫不審正。通典曰宋齊祕書郎皆四員尤為美職皆為甲族起家之選待次入補其居職例十月便遷

又曰祕書郎自齊梁之末多以貴遊子弟為之無其才實故當時諺曰上車不落則著作體中何如則祕書王肅表曰臣以為祕書職於三臺為近密中書郎在尚書丞郎上祕書丞郎宜次尚書郎下不然則宜次侍御史下祕書丞郎俱四百石遷宜比尚書郎出亦宜為郡此陛下崇儒術之盛旨也尚書郎侍御史皆乘犢車而祕書丞郎獨鹿車不得朝服又恐非陛下轉臺郎以為祕書丞郎之本意也

太平御覽卷第二百三十三

太平覽卷第二百三十四

職官部三十二

著作郎

著作佐郎

校書郎

正字

著作郎

續漢書曰弘農楊彪字文先多識博聞與諸郎著作東觀王隱晉書曰陳壽為著作佐郎遷大著作

又曰陸士衡以文學為祕書監虞濬所請為著作郎議晉書限斷

又曰何嵩善史漢為著作

晉書曰元康元年詔著作郎舊隸中書而祕書既典司文籍今改中書著作郎為祕書著作郎

晉中興書曰孫盛歷散騎常侍祕書監常領著作

又曰孫綽為散騎常侍領大著作于時才筆之士綽為其

冠

又曰李充爲大著作于時典籍混亂充刪除煩重以類分作四部祕閣以爲永制

又曰謝沉爲祠部郎何充庾冰以沉有史才遷大著作晉太興起居注曰元帝依故事召陳郡王隱待詔著作單衣介幘朔望朝著作之省

沈約宋書曰何承天除著作郎撰國史丞天時年已老而諸佐郎並名家年少荀伯子嘲之常呼爲姝母承天曰卿當云鳳皇將九子姝母何言耶

又曰著作郎後漢官後漢已來太史但掌天文律歷而已其國記撰述悉在著作江左王導表著作爲史官是也後漢東觀有著作郎

後魏書崔浩好文學時人莫及天興中給事祕書轉著作

郎太祖以其工書常置左右太祖季年威風嚴峻宦者左右多以微過得罪莫不逃隱浩獨恭勤不怠或終日不歸太祖知之輒命賜以御粥其砥直任時不爲窮通改節皆此類也

又曰程駿拜著作郎顯祖屢引與論易老之義顧謂羣臣曰朕與此人言意甚閑暢又問駿曰卿年幾何對曰臣六十有一顯祖曰昔太公既老而遭文王卿今遇朕豈非早也駿曰臣雖才謝呂望而陛下尊過西伯覲天假餘年竭六韜之效

又曰韓顯宗除著作郎高祖曾謂顯宗及程靈虬曰著作之任國言是司卿等之才朕自委悉中省之品卿等所聞若欲取古人班馬之徒固自遼闊若求之當代文學之能卿等應推崔孝伯

又曰趙逸爲赫連屈丐著作郎世祖平統萬見逸所書曰
此豈無道安得爲此言乎作者誰也其速推之司徒崔浩
進曰彼之謬述亦猶子雲之美新皇王之道固宜容之世
祖乃止
三國典略曰齊主以其著作郎祖珽數上密啓命中書門
下二省斷珽奏事初珽爲祕書郎用芳林遍略質樸蒲錢
又陳元康被傷將死憑珽作書屬家累并云祖喜邊有少
許物宜早索取珽不通此書喚喜私問得金二十五錠唯
與喜二錠餘並自入祖喜告元康二弟叔謙季據等叔謙
以語楊愔愔頰眉荅曰恐不益亡者因此得停其後齊文
宣以珽爲祕書丞盜遍略事發付平陽王淹令錄珽付禁
淹遣使收珽珽便私逃黃門侍郎高德正謀云但宣命向
祕書稱奉并州進止須經史各部仰丞親自檢校催遣如

此則珽意自安夜當還宅然後掩捉之果如德正所圖遂
縛送廷尉據犯當死文宣以其伏事先代除名爲民愛其
才伎令直中書普選勞舊遷爲著作

唐書曰著作郎鄧隆上表請編錄御製詩集太宗冲讓不
許隆好學多伎王充兄子太之守河陽也引隆爲賓客大
見親遇及太宗攻洛陽遣書諭太隆爲太復書言辭不遜
洛陽平後隆懼罪變姓名自號隱玄先生竄於白鹿山黃
冠野服不接人事貞觀初徵授國子主簿與博陵崔仁師
昌黎慕容善行弘農劉顓新野康安禮河東敬播俱爲修
史學士隆負宿罪猶不自安太宗聞之遣房玄齡謂之曰
爾爲王太作書誠合重責但各爲其主於朕何有惡哉朕
今爲天子何能追責疋夫之過爾宜坦然勿懷危懼也擢
授著作郎及修史成尋卒撰東都記三十卷爲學者所重

又曰龍朔二年改著作郎爲司文郎中佐郎爲司文郎
又曰劉允濟傳垂拱四年明堂初成允濟奏上明堂賦以
諷則天甚嘉歎之手製褒美拜著作郎
陶氏職官要錄曰著作郎舊視通直郎史才富博者爲之
應亨集讓著作表曰自司隸校尉奉至臣五葉著作不絕
鄉族以爲美談

著作佐郎

王隱晉書曰武帝欲以郭琦爲佐著作郎問尚書郭彭彭
憎琦不附己荅詔不識上曰若如卿言烏丸家兒能事卿
卽堪郎矣及趙王倫篡又欲用琦琦曰我已爲武帝吏不
能復爲今世吏終於家

又曰華嶠漢書十典未成祕書監繆徵奏嶠少子暢爲著
作佐郎卒成十典

晉中興書曰郭璞奏南郊賦中宗見賦嘉其才以爲著作
佐郎

又曰華譚爲祕書監時晉陵朱鳳吳郡吳震等以單寒有
史才白首衡門譚薦二人擢補著作佐郎並皆稱職

沈約宋書曰謝裕字景仁陳郡楊夏人也曾稽王世子元
顯嬖人張法順權傾一時內外無不造門者唯景仁不至
年三十方爲著作佐郎相立誅元顯見景仁謂四坐曰司
馬庶人父子云何不敗遂令謝景仁三十方作著作佐郎
後魏書曰宋弁字羲和爲著作佐郎尋除尙書殿中郎中
高祖曾因朝會之次厯訪治道弁年少官微自下而對聲
姿清亮進止可觀高祖稱善者久之因是大被知遇賜名
爲弁意取弁和獻玉楚王不知寶之理也

後周書曰黎景熙字季明正定古今文字於東閣大統未

除安西將軍尋拜著作佐郎於時倫輩皆位兼常伯車服華盛唯季明獨以貧素居之而無愧色又勤於所職著述不怠然性尤專固不合於時是以一爲史官十年不調張華別傳曰陳壽好學善著述除著作佐郎當時夏侯湛等多欲作魏書見壽所作即壞已書

文士傳曰東晉晚應司空辟入府六日除著作佐郎著作西觀撰晉書草創三帝紀及十志

又曰張載作濛汜賦太僕傳玄見賦歎息稱善以車迎載言談終日玄深貴重載遂知名起家徵爲佐著作郎

校書郎

六典曰校書郎八人正九品上掌讎校典籍刊正文字漢書曰劉歆字子駿少以通詩書能屬文召見成帝時待詔宦者署爲黃門郎河平中受詔與父向領校祕書講六

甄傳記諸子無所不究

又曰王莽流劉棻時楊雄校書天祿閣上治獄使者來欲收雄雄恐不能自免迺從閣上自投下幾死莽曰雄素不與事何故在此問其故迺劉棻嘗從雄學作奇字雄不知情有詔勿問

後漢書曰馬融字季長博通經籍永初二年大將軍鄧騭聞融名召爲舍人四年拜爲校書郎中請東觀典校祕書是時鄧太后臨朝騭兄弟秉政以爲文德可興武功宜廢遂寢蒐狩之禮息戰陣之法故使猾賊縱橫乘此無備融乃感激以爲文武之道聖賢不墜五才並用無或可廢乃上廣成頌以諷諫

王隱晉書曰鄭默字思元爲祕書郎刪省舊文除其浮穢著魏中經中書令虞松謂默曰而今而後朱紫別矣

晉令曰祕書郎掌中外三閣經書覆校闕遺正定脫誤
晉太元起居注曰祕書丞相綏啓校定四部書詔遣郎中
四人各掌一部

唐書曰楊炯華陰人幼聰敏博學善屬文應神童舉拜校
書郎爲崇文館學士

正字

六典曰正字四人正九品下掌讎枝典籍刊正文字

唐書曰陳子昂苦節讀書尤善屬文高宗靈駕將還長安

子昂詣闕上書陳東都形勝可以安置山陵關中險旱西

行不便則天召見奇其對拜麟臺正字

又曰吳通玄父道瓘爲太子諸王授經而通玄兄弟出入

禁掖恒侍太子遊通玄與兄通微俱博學善屬文文彩綺

麗通玄幼應神童舉釋褐祕書省正字

又曰蘇弁字元容京兆武功人也弁少有文學舉進士授
祕書省正字

唐明皇雜錄曰劉晏以神童爲祕書省正字上問晏曰正
字正得幾字晏曰天下字皆正唯明字未正玄宗大奇之

太平御覽卷二百三十四

